

Stichtingen  
Fund. Sandy Tromp



# Sandy

***Sandy Charlaïne Tromp ta un hoben masha stima riba nos isla un hoben cu atravez di añanan e pueblo a siña conoce biba cu tur su logronan, su deseonan y e aña aki Sandy un biaha mas ta bolbe musta Aruba henter cu caminda bo tin un soño, bo tin un futuro.***

***Un deseo enorme ta brota di Sandy su alma y e deseo aki ta pa e por haci su bida manera cualkier mucha y un dia bira juf-frouw di school.***

Sandy Tromp ta bin di e barío di Tanki Leendert y di chiquito caba Sandy a yega di presenta su mes na e pueblo di Aruba pa medio di programanan special, recaudacion di fondo pa un auto special etc ect. Sandy tin actualmente 13 aña y ta un hoben masha amical, alegre y inteligente. Sandy cu añanan no a laga nada strobe di hiba un bida normal esta di bay school, di hunga di tin amistadnan. Sandy ta den rolstoel pa motibo cu Sandy cu un aña a wordo diagnos-

tica cu un enfermedad di spier cu ta Spinale Musculaire Atrofie cu su spiernan ta zwak cu ta haci cu e tin cu usa un rolstoel pa e por move y ora cu e haya griep esaki por ta hopi peligroso pe, ya cu e no por saca e slijm facil.

Sandy nunca di su bida no a cana. El a pase den un rolstoel y semper tur hende rond a purba di haci Sandy su bida uno normal manera otro muchanan, cu e por a hunga, bay school etc. Sandy a pasa door di hopi cos manera ora cu e tabata chiquito e mester a siña deal cu e situacion cu e no por cana y riba dje e pregunta cu semper e ta haya pakico e ta den rolstoel pero esaki cu tempo el a supera e etapa aki cu awe nada di e cosnan aki no ta molestie. Sandy nunca no a pega na school, ademas hendenan den rolstoel ta conoci pa ta hendenan cu tin un nivel di intelegencia halto y Sandy no ta exepcion manera cu Sandy mira un buki su dilanti e ta cla pa lesa y e ta gusta siña ta pesey tambe cu tur su rapportnan semper tabata bin cu puntonan haltisimo.

Durante di añanan e no tabata facil pa logra haya tur e material necesario pa yuda Sandy pero pa medio di recaudacion di fondo y pa medio di e Fundacion Sandy Tromp e famia ta logra haya ayudo di pueblo




cu nan ta logra cumpra hopi cos cu Sandy tabata tin mester. E auto special cu Sandy tin ta uno cu ya su tempo a yega y e no ta traha bon mas pa cual un biaha mas e fundacion ta mira si comunidad por yuda Sandy atrobe pa logra cumpra un auto special pa por subi baha pa haci su bida un tiki mas normal caminda cu e por bay hopi lugar y atende su school cu ta importante.

Sandy no por haci mucho cos sin ayudo, casi tur cos e mester haya ayudo di un otro hende .Sandy por scirbi, come, bebe, pero e no por lanta nada cu ta pisa, e por tambe traha cu computer, celular etc y na school e tin un asistent cu ta yude cu tur cos pero na cas ta e famia tin cu yude. E situacion actual di Sandy ta tiki fastioso, como cu pa motibo di un rolstoel cu no ta adecuado, el a desaroya scoliose (deformacion di su columna) tambe e tin un tiki problema cu su heup banda robiez. Semper cu a recauda fondo pa Sandy, tabata pa mantencion di su auto cu ta hopi costoso, pa cumpra rolstoel, pa reconstrui e baño na su cas, cada biaha cu Sandy tabata bira mas grandi. Y pa hopi otro cos mas. Por lo pronto e no mester opera su scoliose. Sandy ta bao guia di Dr. Bennett, revalidatie arts, y e no ta haya therapie mas. Sandy tin hopi amiga. For di su niñez semper e tabatin mucha banda di dje. Apesar cu e situacion ta cambia awor cu Sandy ta na un school secundario semper e lo sigui haya muchanan cu ta yude y stime y muchanan mal cria, pero e no ta kibra su cabes cu nan,

Sandy semper tabata sa di chiquito con e tin cu deal cu situacionnan fastioso di tentamento y awor cu e ta grandi esaki no ta molestie, pasobra el a wordo educa cu e tin mes derecho cu otro muchanan pa ta na e mundo aki y wordo trata cu igualdad. Sandy semper a haya masha cariño y amor na cas, di tur familiar y conocirnan y esey ta loke cu Sandy a desaroya y crece cu un base principal den su educacion cu ta su motivacion y su deseo enorme di lucha pa progresa. For di 6e klas Sandy mester a bay Colegio Arubano, pero e mes a dicidi pa bay Colegio San Antonio, MAVO. Awor cu e ta bayendo 2e MAVO, su punto nan ta suficiente atrobe pa bay Colegio, pero Sandy mes a dicidi pa keda MAVO. E ta hopi contento na su school y no kier haci e cambio ainda. Sandy no por practica ningun deporte pero den su oranan liber ta pasa hopi rato na computer ta chat cu su friend nan. Sandy mester un rolstoel special awor aki cu mester adapta na e curvatura di su lomba, traha na midinan special cu ta hopi costoso y tambe e auto cu ta transporta Sandy, pronto mester wordo cambia, como cu el a bira bieu y su mantencion ta hopi costoso mes y ta pesey Fundacion Sandy Tromp ta pidi e pueblo di Aruba cu semper tabata para cla pa yuda Sandy y cu ta un pueblo generoso pa un biaha mas uni pa por yuda Sandy pa medio di donacion of loke cu nan por yuda cune, lo ta altamente aprecia pa Sandy y famia. Sandy tin un ruman homber di 19 aña cu ta studiando na Hulanda cu ta stima Sandy hopi y cu apesar cu no tur atencion tabata pe den bida pero pa Sandy semper e tabata tey pa yuda Sandy y ta un hoben cu ta orguyoso di su ruman muher.

Sandy ta gusta mucha chikito y semper e kier a bira juffrouw di school y ta pesey Sandy ta kere cu tur cos e por logra den bida no matter cu e ta den rolstoel, "unda tin un deseo tin un soño pa cumpli".



# Su deseo mas grandi ta pa bira juffrouw di school